

程

鄭詩序

閩中鄭繼之弱冠穎異善屬文既長登第泆交
海內名流濩落無所容遂託疾遠遊慕鄒魯之
風遵海岱凌日觀既乃浮淮達泗適吳徂越探
禹穴躡鴈宕振衣風塵之表其意嗷嗷如也已
而結屋少谷之山潛心大道攬觀萬物之終始
譬猶鸞鳳乘風九閔之上飄飄游豫而時人莫
測也夫辭榮耽寂者其志曠窮幽遯遠者其思
奇故其放而爲詩也龍翔虎變波涌雲蒸備極

情態命世之詞也詳其所至正足以翼三百篇之經變可以摹於騷漢法以準其體魏辭以則其要晉選以暢其氣唐音以澤其和盡性情物理之懿義不詭於風人矣少谷已沒其言立於後世死而不朽其以是夫

嘉靖乙酉孟夏朔華容周廷用敘

重刻鄭詩序

自三百篇之降也浸淫至於勝國蓋正始無遺音云國初作者尚沿餘習至弘正之際然後琢雕破觚力返茅靡時則二三君子之功爲多而吾郡鄭繼之先生其一也先生曠世軼才其於詩有所獨詣命騷以還至於大曆靡不兼總條貫故矧旨命義蒼然古色高足頡頏兩京下不失凌鮑謝朱絃希音型羹寡和一切人間藻繪可憐之曲不啻沉之濮水當時與北地金昌

諸君子執鞭弭周旋海內翕然向風要其終身
所至於少陵氏可謂具體而微矣先生家食以
孝友式里閭立朝抗疏瀕九死而不回死之日
家餘四壁子孫至不能自存蓋其生平志行有
足配千古者昔人所稱三立先生兼有之非徒
董以詩不朽已也天旣奪先生之年而復孱先
生之後遂令其遺言幾至湔滅余小子不勝懼
焉曩歲議與諸同志一新之而弗果後余李吳
興而鄧女高計部以搜粟來會其志適與余合
遂稍爲校定而授之梓嗟乎自繪事勝而情性
遠七子興而大雅衰里中耳食之輩徃徃喜遠
交而近攻蓋先生沒且百年而論今日始定悠
悠黃河寧復可清而況夫其下駟走者也掩卷
卒業但有三歎

萬曆丙申春王正月中澣日後學謝肇淛序

鄭繼之先生傳

郡人鄧原岳撰

明文章至弘治而一變於是作者百數十家而北地李夢陽信陽何景明吳徐禎卿及吾閩鄭善夫先生最著先生字繼之別號少谷山人而自其初生太夫人夢日墮于懷吞之遂有身先生幼負奇質髫髻權隸學官則已厭薄一切經生言學爲古文詞有聲矣二十舉於鄉明年爲弘治乙丑遂成進士而何景明寔直中書相得驩

甚益切劘爲古文詞已亳州薛蕙黃州王廷陳
吳郡顧璘三衢方豪東平殷雲霄皆一時知名
士後先至咸折節而交先生文酒過從靡間也
毅皇帝初先生猶在選人纂脩蘇松常鎮實
錄成隨丁內外艱積六年授戶部廣西司主事
出權濟墅關譏闌有法著爲絜令是時中貴人
方用事亂朝政先生鬱鬱不自得竟移病滿三
月上書請告歸歸則築少谷草堂於鰲峯顏其
亭曰遲清以見志交與鮮絕守令干旄往候顏
色先生以一童子支剝啄終無所造請諸公愈
益賢之正德十三年先生病良已起補禮部祠
祭司主事守員外郎滿三載考贈父母如其官
嘗奏改曆元事宜語甚核詳具經濟錄中 毅
皇帝之末年儲位久虛逆藩素蓄異謀嬖人江
彬及諸中貴人相左右爲奸諸曹郎黃鞏等以
諫止南巡語侵彬彬大恨矯 旨杖闕下有死
者先生不勝憤挾舒芬張衍慶復上疏切諫彬
益怒罰跪午門已杖三十幸不死當先生罰跪

時猶草疏數千餘言納懷中言所以不當出狀
謂方豪曰死則上之無何而 駕發先生詫曰
已矣無所容吾言矣彼地下者其以余牖下非
夫哉遂再請告歸山人孫一元故與先生契分
不薄先生歸一元且死則間道之茗溪哭之爲
經紀其喪浙東饒佳山水洞天石室多仙靈壑
宅如禹穴天姥蘭亭鴈宕之屬慮無不受杖屨
者嘗雪中游天台褐衣筍輿吟趣甚適時顧璘
方守天台聞之曰此必吾繼之也亟使人邀之
爲盤桓竟月無何歸閩有終焉之志先生故居
南湖去郡城五里而遙地稍勝先生與一二曹
偶如林欽侍御傅汝舟高濂秀才日觴咏其中
而守君汪文盛者時時屏騶從從之先生特爲
具算器食濁醪數斗佐以杞菊汪轟飲至醉也
嘉靖改元先生用薦起爲南京刑部郎中尋改
吏部行至建寧遊武夷山大風雪爲寒所中竟
游歸病遂欲抵家二日而殊年三十九耳病亟
猶手書鄭重以遺文託高傅二子而後瞑卒之

日紫氣勃勃不散蓋先生客天台嘗語華玉明年海上紫雲東來是吾觀化至矣人以為其語驗云先生為文章泚筆立成渾雄蒼老大抵出入諸子而本之六經其詩以氣格為主以悲壯為宗古詩樂府沿漢魏下及六朝歌行近體抵掌少陵絕句翩翩有青蓮之致書法尤入神真行斟酌聖教狂草奔放縱橫爛熳顛素而下弗論也間又創意點染花草叢篠怪石得象外趣然絕不名其業以此人亦鮮知者嘗一晤王文成于毘陵慨然有味乎性命之學則從湛氏得其緒而力行之功取專詣非獨立門戶而已先生每言經生局迹蟬緩其衣多文辭而鮮實效何益於殿最乎居恒取國家掌故講其廢置所繇及利害甚督每郡邑有大政先生為決策務中機宜其所莊事者莆陽林俊司空林雅推轂之謂有大臣之器厄於年而不得售惜也林鈇又言先生篤於內行婚嫁七弟妹羔鴈筐篚無不自其手指出者葬母屬二十餘喪皆假貸於

子錢家其厚如此汪守君既葬先生於梅亭已
編定其詩文各若干卷行於世而子通經世要
談軼不傳

鄧原岳曰余小子與鄭先生不相及而於先生
外孫林學憲道茂許睹先生像髯而都若神仙
云其集今盛行世有知者或乃謂時非天寶位
靡拾遺以無疾呻吟爲先生病夫明正德於唐
天寶安取低昂哉而欲呻吟者之必爲賡歌也
惟王元美評其詩如黃河水凌得杜之骨庶幾

實錄云

鄭詩目錄

卷之一

飛龍引

慈竹引二首

病起步西禪

望夫石

南關

金山紀遊二首

彭城

不寐

阻濟上

古戰場

憂朔方

古意三首

懷金山

除夕二首

甘泉子

夏朝同顧九和侍講湛次泉編脩應元忠

吉士汎舟出西崦遊太湖

菖歎二章贈太初

子夜吳歌九解贈殷近夫

寇至

此夕

病起送方思道

吳中吟二首

太白山人歌

吳閭

秋興

狼山聞捷

雙鴈

粵中元父歌

冬日同顧九和殷近夫孫太初顧與成汎

太湖

至日

對雪答太白山人

送太初觀海

江上送殷二秀才

除夕二首

元日

苦寒行二首

放舟荆溪尋張公洞不果歸至瀟湖起步

長橋望煙景放歌

遊焦山

河上行

河上送鮑使君

貧女吟八解

二月晦日發滹沱

義鳩篇

贈黃肇三首

送司徒孫公歸安陸五十韻

夏日闕庭見鶴

夏日嘆

朔州行

雨

秋月

古劍行贈仇將軍北征

題九峰書院

贈潘子四首

林員外東甌斗城圖引

發京邑迷路投宿黑庄

小岷山歌

武夷曲次晦翁棹歌十首

鄭詩卷之一目錄終

鄭詩卷之一

閩中鄭善夫繼之著

郡人鄧原岳女高

謝肇淛在杭同校

飛龍引

採銅鑄寶鼎煉作九返丹服食壽長生長生千
萬年白日跨飛龍宸遊上九天如何鼎湖路一
去無時還君子貴及終仙術諒非難方士費論
說彼心詎能安秦皇與漢武黃土高嶺岼

蕙言
卷之一
慈竹引二首

北堂慈竹連理枝，青陽含惠流綠滋。堂中佳人
雲珮垂霞冠，鶴帔光陸離。麻姑盈盈進紫觴，東
方小兒翺且翔。徐歌緩節宵未央，明星煌煌應
壽昌。

其二

芙蓉朱蕤蘭紫芽，含風被露齊發花。庭中象席
連鳳珈，流輝照耀麒麟車。麻姑盈盈進紫觴，東
方小兒翺且翔。徐歌緩節宵未央，明星煌煌應

壽昌

病起步西禪

一春伏枕鶯可憐，病起野池明白蓮。偶爾梳頭
出城郭，便應看竹到西禪。天晴求食鳥雙下，日
午閉門僧獨眠。明發螺江有行役，紅塵白鴈異
風煙。

望夫石

自君之出矣，日日望君歸。秋風吹紫塞，夜夜擣
寒衣。樓蘭未滅君不歸，含啼獨自下重幃。玉關

西去路如棘安得身隨鴻鴈飛
食茶中自苦食藥那忍食
西風吹妾身化作望夫石
東海之水成丘山公乎何時生
入關年年風雨裏但見血痕斑
妾心匪石不可轉君身如璧當來還

南關

度隴心忽折殊方梅柳春
兵戈近滿眼書劍老隨身
世有阮籍淚道應原憲貧
愁聞更選士東土已風塵

金山紀遊二首

雙眼無空闊長江會百靈
吳門對海定淮樹貼天青
鐘動鼉鼉窟雲生鶴鶴庭
中流有孤志鼓柁下滄溟

其二

灑灑中冷水東遊與散愁
樓臺通海霧歲月送江流
好事憐司馬逃空想惠休
獻花緣尚淺心折過揚州

彭城

朔水薊門誰問津
洪河波浪眼中新
孤舟此夜

山城雨短劍長年驛路塵鄭老有官無飽飯杜陵多難每依人飛書近報齊梁破何地江湖托此身

不寐

客思苦不寐驚心豺虎喧羽書秋後捷鬼哭夜深魂歲月消殘燹風烟失故園彭城有弟妹締綵念溫存

阻濟上

叔伯何多日關山烽火明病妨風土惡身與歲時征喪亂懷先帝艱危有我生向來劉越石意氣不能平

古戰場

朝發汾河暮經白溝茫然戰場四時爲秋黃雲阨關壯士不憂拔劍斫地戰骨無收風沙冥冥髑髏嘯歌鳥飛不下客行奈何世無鳳麟龍虎鬪爭誰哉弄丸四海解兵

憂朔方

疾風吹塵翳天地聞道山東盡兵燹血馬徒兒

挾長堤東搏西擊過臬驚道傍達官聞走避孛
屬就縛如棄徒日午城門不敢開千村萬落空
烽燧國家承平重文事天下州縣無武備向者
潢池一鼓擊將軍士卒皆兒戲青衿儒生無壯
志大募壺漿與簞食焚香拜首願勿殺金帛婦
女豈論費落日縣官走饋遺十且八九被拘繫
北方郡縣一掃空田野但見旌旗熾青城圍解
清河棄萬室遊魂化魍魅黃昏腥血赭河水白
日慘愴照殘魄萬騎長驅入廣平廣平赤子無
噍類邇者又聞消息惡北出居庸誘胡騎黃頭
奚兒好射利陰山驕子更多知黃河冰合不可
知秉鈞老子毋輕易塞內羌戎不足恃目下亦
作中原祟 天子宵衣重撫諭野心狼子終攜
貳少谷山人夜不寐十年家食嘗驚悸一編狂
言不敢忌欲叩 帝闈淚如漬

古意三首

蓬門霜雪繁玉顏苦禁當稍識春風面春風轉
斷腸

其二

蠶盛不理粧露采陌上棄但知織作緊不覺年
貌傷

其三

寶鏡皎如月價值千黃金偏照可憐色不照可
憐心

懷金山

我愛金山寺洪波萬頃開乾坤留柱石滄海失
蓬萊曝日鼉鼉出搏風鶴鶴迴中泠洗心處極
目意悠哉

除夕二首

百戰無寧日窮年作宦情故山惟夢到異域獨
燈明冰雪淹公子風塵掩客星無家杜陵老經
亂鄭康成北望關河固東遊歲月更安危仗王
室鼎食愧昇平

其二

三元今夕到羣盜幾時平河洛新流血齊梁日
請兵羽書連樂國鞞鼓動神京大將真無敵元

竟未就烹地悲殺氣盛天苦歲功成進退吾何
據椒盤空復情

甘泉子

客有羅浮君羽衣行翩翩長揖謝世事鍊性三
十春沆瀣不滿口貌如藐姑神問道廣成子空
同高嶙峋挂瓢倚樹枝振鳥天風門謁來吊延
陵晤言東海濱示我紫尸術挺身入層雲誓將
結瑤華引手長相親

夏朝同顧九和侍講湛次泉編修應元忠

吉士汎舟出西崦遊太湖

西崦山前逢首夏與君一笑共扁舟已無梅花
爛刺眼賴有太湖清散愁晴日菰蒲鶩鶴下遠
風波浪魚龍遊酒酣忽憶鴟夷子長日挂帆天
漢流

菖歎二章贈孫太初山人

菖歎葱葱在彼澗濱歲茁九花世人不紉秘之
穎谷以俟雲君念彼葦菹蒼蒼廣津

其二

莫言
卷之一
七
葛歎青青在彼原隰歲茹九節可以絕粒華滋
寂寥爾乃獨立世無神皇鳳衰麟泣

子夜吳歌九解贈殷近夫

郎今落海濱儂亦可憐身不見昌陽草何曾生

要津 一解

儂身不下堂郎居隔江水雖則隔江水思心日

萬里 二解

昔別于何時十載參與商豈是無所見狼嘴夜

夜張 三解

夜夜撫素琴惻惻生怨慕枯桐在膝上梧子在

何處 四解

融融四五月婉婉采蓮女海上無芙蓉渠誰則識

蓮子 五解

低頭摘荷葉舉頭看月光歸來覓剪刀爲歡製

衣裳 六解

終日對海棠終夜不成寐何以不成寐花開儂

獨自 七解

登樓看雙星蜘蛛在樓角綿綿腹中絲求匹不

能得八解

歡去一何久歡來一何晏來時何所贈雙雙雲

錦段九解

寇至

白日淮陽飛羽書浪翻鯨駭振江湖六飛聲斷
天狼穴七郡功虧銅虎符即見縣金募丁壯更
聞空國補軍輸君王不刊封侯印祗事江南未
獻俘

此夕

時危長伏枕月好自臨關斥堠連吳越烟塵犯
海山民窮久欲亂師老未成班此夕姑蘇酒酣
歌不破顏

病起送方思道

問君何日棲武夷送君出門雙淚垂三春伏枕
自氣候一朝出郭空華滋知他濁酒有誰共折
此垂楊不自持滸墅關頭聽人語盜賊滿地將
何之

吳中吟二首

出自吳東門遙望姑胥臺望久無所見回風慘
蒿萊圖王志未就神木生劫灰三復春秋傳英
雄使人哀

其二

越女進館娃楚囚落天涯二物不並立海水漂
鴟夷湛盧南入郢神物竟先知吳宮八百年旦
夕遊鹿麋緬晤喪亡主豈盡庸以誌

太白山人歌

吾聞太白之山橫絕沙磧東去天盈尺秦地雄
陰厓古雪吹烈風開闢以來如白龍赤日橫半
度百草不發天無功山中之人冰雪容食霞吸
露五內空綠雲結交河上公壽三千歲顏如童
北招汗漫南挾韓終椒丘縣圃直天幾度拊嘴
捫畢天爲通長髯下照滄海水玄虬跋浪吹蒼
穹視彼守株之徒奚啻黃鵠之與壤蟲吾將乘
元氣與君遊無窮

吳閶

萬木蕭蕭河漢秋吳閶斜日獨登樓眼中禾黍

茅茨怨海上風塵笳鼓愁一命未忘青瑣闥幾
時還問白蘋洲燕然銅柱男兒事謾倚青萍看
斗牛

秋興

梳頭出門秋滿溪蓼花無數明大堤堤邊桔槔
獨婦女海上羽箭多男兒中原已失尚方劔南
國全看飛將旗青草沙頭有消息天未悔禍人
焉爲

狼山聞捷

龍驤百萬向南征水陣堂堂赤幟橫旋報狼山
歌小海喜看元帥是書生連年江漢傷多事此
日朝廷念太平漢戍秦疆俱鄙陋須將四海作
長城

雙鴈

雙鴈爲人得堦前相向鳴已辭關塞遠猶帶網
羅驚宦情一片影客淚五更聲側目窺秋隼風
烟異性情

粵中元父歌

泉山老子金馬仙青陽溫風春可憐魚須奉

帝三十年角巾南首泉山前司徒起家青棘郎

娟娟寒素臨秋霜炯如白鳳從 君王瑞文冥

舉天地荒壺公山人見素子頻年三出還三已

玄文突兀凌太華峻節孤稜冠青史木蘭江上

弄烟水豸角雞香惡用爾中丞寥寥新齋公麗

如月露映梧桐白筆持裁陳素封殿前斥奸氣

如虹蒼蠅貝錦心不同中丞解纓猶潰癰蚤歲

稱知犯公眼酬知力共塘蒲晚齊州腥氛黯長

夜飛騰願附冥鴻遠玉龍手提不可成長歌一

夕雲河傾

冬日同顧九和殷近夫孫太初顧與成汎

太湖

震澤夫何如歲晏意自好天風吹玄冥雪浪入

浩漾鼃鼃浮山岳白日搖晴昊洞庭渺林屋流

水隔煩惱昔有綠毛翁於此採玄草風雲白石

牀鬼物爲持保聞茲長道念攜臚事幽討平生

竹溪逸矧是同懷抱相從捫綠雲坐聽啓鴻寶

終當吸沆瀣去去遊亭纛

至日

白日冉冉復南至闔閭城西客未歸山中桂樹
歲月晚石上梅葢園池非白鳧雨雪爲誰急黃
鵠天風終自飛安得垂衣歌帝力坐分滄海釣
魚磯

對雪答太白山人

天地忽改色六花風亂投翛然翠袖薄加我草
堂幽照水梅自媚閉門君不憂玄機正無極將
汝醉鄉遊

送太初觀海

天風颭颭吹歲暮汝今復欲東南征大江波浪
蛟出舞滄洲歲月芝長生水經地紀足勝事鳧
鳥鷺瓢非世情洪河雪後會相憶我在蓮花峰
頂行

江上送殷二秀才

觀子在逆旅失子在歲晏一似南飛鴻一似西
歸燕繁露戾修林終風捷如箭過翼趨所期殊

集言 卷之一
方卒相見物情異冷煖人事阻華面遲余玉門
春子復穴梁殿

除夕二首

忽忽屠蘇夕匆匆吳楚春歲花無奈守酒盞可
憐頻世短聊看斗時艱復問津劔文差不翳猶
得慰情親

其二

喪亂滿天地風煙無古今吳門又除夕粵客未
投簪燈暈他年夢椒花故國心翻憐癡兒女嬉

笑夜堂深

元日

東君御征轅玄冥迅回車溫風倏爾至古梅茁
其葩桃戶新受符蓼盤香團芽感此念故里兼
之懷年華炙鱗洽弟兄問歲話桑麻二朞走逋
旅簪紱生嘆嗟坐茲失初服五內長負痾兎窟
有穴狐凰木亦棲鴉悟機貴在蚤勿令負雲霞
苦寒行二首

刀兵之餘氣不淑立春一月寒猶酷東日微微

背賜谷西風獵獵遺華屋吳儂號饑拜人前吳
姬受凍啼門曲去年冬雷折地軸

其二

南冠丈人何偏仄惡風吹雲閉春色白梅陰多
開苦遲黃鸝口噤啼不得東方征輪斷無迹嗚
呼彼蒼未肯迴天戎翻令絲絮專元功

放舟荆溪尋張公洞不果歸至漏湖起步

長橋望煙景放歌

日晷于東馳羈人復北征鼓舫下荆溪言訪張
道靈緣薄扼事艱意短迴修程稠年戒襟素履
茲荒志誠坐令紫霞居遠隔於青冥所賴漏湖
好煙景疏天聲躑躅騁瞻眺稍慰滄洲情青鏡
不肯私金精幾時營寓形若流電空懷紫金經

遊焦山

焦丘龍臥浪冥冥瓜步雲回海樹青風塵重問
焦光洞讀罷華陽瘞鶴銘

河上行

白鴈噉噉思朔方烏衣逐逐度河隍河間草樹

色焜黃淮西二月春悲涼北風慘慄日無光洪
 濤簸天不可航晨風下食百鳥藏妖虬怒鯨連
 山長途遙日暮雨沾裳臨河欲渡愁無梁散髮
 狂風何郡郎筇篻絃絕聲不揚側身天地夜未
 央愁燕愁粵熱中腸

河上送鮑使君

柔風協河洲回飈被泗濱賢輶指玉衡過門不
 停軸結交何所將解我雙英鼓豈無錦繡段感
 彼並朽藁希君復自愛勿使輜出櫝

貧女吟八解

南陽有貧女抱甕立水澳趾短泥濘脩挽衣以
 不丁自言良家息淪躋類草木亦知奉壺範誰
 與周犖獨一解

犖獨誰與周室中無遺儲閉戶理機杼苦樂中
 自知揚聲度昏旦糝糟轉無時豈不愛綺羅迺
 有杼軸悲二解

杼軸曷足悲感往思維谷三年喧格鬪肉骨不
 可贖非無好里閭處子有約束失時當告誰甘

此守餽粥

三解

東隣有嫠婦宵旦當戶哭良人淹戍邊存否不可卜近聞邊釁起百萬化魚肉生離云有期死

別竟何續

四解

西隣亦送女夫婿輕薄兒朝捷忘歸矢暮挾青樓姬床頭合歡被桁上嫁時衣悠悠百年思采

非生怨咨

五解

南村有棄婦曩亦誠誰肅夫君心不同入閨轉見逐白頭且勿唱綠髮頓空谷榆蒲悴高秋却

怨飄風速

六解

北里多豪華服御紈與綺張幕集權貴炮熊炙文鯉妙舞襍燕趙徵歌遍梁楚豈無良蹇脩妾

心自不爾

七解

鳳凰棲梧桐下食青琅玕鴟鵂嚇腐鼠但識彼所歡人情競刀錐豈識達士賢庭槐鳴周周微

音向誰宣

八解

二月晦日發滹沱

二月晦日暄風寒滹沱水深舟楫難已攜家室

情復惡況憶兄弟鼻俱酸白鴈一雙杳然去黃
鵠數年離哉翻幽并氛祲只昨日客子胸臆何
時寬

義鳩篇

端居肅元府永惟玄化機神理罔有忒衆萬詎
能違翔植紛總總氣感率有知無論大聖狂咎
休固其宜荆茂于義音烏馴以孝思細德亦鼓
物而況鳳與麟戒言彼狡童胡自決德基達人
上內植履祥復何疑

贈黃肇三首

終風勁柔條遊子返故鄉兄嫂糝藜羹慈母縫
衣裳離觥載恹惻平日天一方來忘楚塞遠去
覺閩山長

其二

來如秋空鶚去似春泥蠖春泥何淤沮百足進
復却人情鄉邦好歸客何蕭索室堂雍婉變殊
方信不惡旋飈掠檣烏骨肉臨當坼

其三

上林未揖讓廣莫進癘瘴大江不可踰坡陁莽
翻蕩入門報所親何以慰惆悵庭萱蕤有永塞
鴈宛相望

送司徒孫公歸安陸五十韻

國步多艱日黃圖八葉時正人俱遜避冥運莽
推移在昔先皇世明公早典司菁華臨驥裊
瞻聽下須彌德業周王佐賢勞漢度支坐舒千
里足遍察萬方眉時值中原擾頻徵北鄙師向
非籌百萬安得活瘡痍理劇虛投刃回淳重執

規赤心醫國石白首向陽葵朝著留清望廷爭
抗直詞杜公良不忝樊子豈無奇祿秩方登俊
兒童不免饑少焉看短髮率爾問青芝懇切封
中疏闡淤夢裏思王言溫莫挽傳馬去猶馳肱
股定虛曠鳳麟難繫羈韋年寧待暮常版却應
誰允矣修初服忻然集故知養真同在洛憂世
類還睢萐輅北宮子鹿裘榮啓期釣溪人罕識
遊岳鶴長隨信是勞筋息其如柱石衰崑堂喧
燕雀城社保鼯狸黔首殲金氣旄頭直玉墀豈

惟餘狡兔遽使有鴟夷浩蕩南溟徒差池北斗
垂帝能忘反側天未欲雍熙前席追才子高軒
杳健兒汾陽終復起回紇定深疑世道今如此
言余何所之狂誑通劍術憤激撤書帷猥作龍
門客載歌淇澳詩未緣經品藻竊幸受鑪錘食
忝侏儒粟才妨寢廟犧役形酬顧遇鏤骨爲嗟
吹永願參徒御猶希附鼎彝此心何覲豁人事
竟離披貢禹情堪吊任安義匪疵幾能容傲吏
奚止失師資恨恨悲鳴缺奄奄嘆守雌肩隨遑
點染影吊趣磷緇便作開籠鳥還慙掉尾龜卽
尋鷗鷺好甘與簿書辭采藥靈源洞紉蓀少谷
陂靜便粗布褐安穩小茆茨述作刑司馬冠纓
薄李斯嵩高塵不雜來挹九峰姿

夏日闕庭見鶴

景風薄梁殿銅雲遞玄虛侵星不櫛髮入直承
明廬竭來雙白鶴蹒蹒下形除竦身舞飛容揚
音結長吁物情舍所因悲鳴胡爲乎曰余覽幽
經醜爾情不舒霜毛麗藻質豈受泥水汚內飫

土木氣外有金精敷盜泉非吾願腐鼠安足圖
緬惟玄圃驂迺是青田雛言茲非世畜何以羈
此都誤入燕雀網遂被樊籠拘委質太液池昂
藏狎鷗鳧鳧崇朝受餅餌向夕聽傳呼以茲抱懊
惋寧復競盈餘冉冉積年歲玃玃向盆盂豈無
四海心所惜六翮踈顧惟鷹犬坊豈乏耳目娛
矜春有雪衣絕地復的盧終當返真性去去翔
天衢一舉歷五岳再舉遍九區儵然逐鳳凰下
來瑞唐虞此意良不極流光倏于徂麟傷古亦
然聊自遣煩紆

夏日嘆

長羸何蒼涼大火不烘爆燭龍西北死跋烏東
南蹙遲遲凌曾桑忽忽下蒙谷鈞天不敷華羣
陰豈全伏金星似火赤未盱卽動角應感陰沴
盛轉訝日晷促羲和職業廢寒暑事反覆麥秋
猶寒衣絺綌未卽錄雄風來蓬蓬慘怛蜚大屋
揚霧清晝昏愈覺白日速迅雷不發榮虺虺振
坤軸三時無雨澤何以升五穀蠃蟪復不仁延

禍到樸檉近聞河內外數載茹草木更兼豺虎
繁死者十五六諸公樂安穩羣倖厭梁肉萬姓
亦何罪坐使蒙螫毒以茲和氣乖無怪邊釁踈
天人象已顯巖廟計須熟緬思弘治化歷歷在
耳目變理得所司氣候有攸屬八風率順序五
緯不愆轂廿年宣重光萬國昭玉燭平路生廣
庭箠脯出荒服所以覆幬下老不聞殺戮中遭
屢更變美意尚可掬勗哉柱石翁弘治是龜卜
狂夫不解事豈敢糜廩祿倉皇杞人憂凱切麥
丘祝但願麗大明末光普曾曲

朔州行

朔州城頭凝黑雲朔州城下邊人魂胡兒悍驕
好殺戮少壯戰死今無存悲風南下吹簷築馬
逸飲血太白窟不見饒歌入塞門但見人骨白
峯嶽近來衣冠苦出粟豈說千朝養精卒班生
介子不應募願弄胡笳令歸去

時逆瑾罰廷臣入邊儲

雨

黃埃莽莽二麥死幽天五月無雷雨祗疑青竹

修大雩忽見黃頭澤下土少男風生鳥鳴渚蒼
龍行天翠蛟舞兒童拍手歌蜥蜴徵斂從茲脫
筮楚廼者盜賊連三霜以致逆氣成旱荒老稚
大半委溝壑丁壯豈免從豺狼況爾犁鋤鑄爲
兵縱有廢地無復耕東家鬻兒西鬻女骨肉之
怨何時平只今一雨民稍寬柳葉榆錢尚得殮
莫令邊陲又金革公賦從容私始得

秋月

初昏見秋月耿耿卽西傾河漢留光景關山入
杳冥衆星森北向一鳥浩南征莫遣微雲起渠
能穢太清

古劍行贈仇將軍北征

將軍手提三尺冰乃是鬼國之鐵大齒之珎滄
溟水枯涿不成莫邪斷髮躍冶死而後龜文漫
理流天晶霜鋒閃爍鷲鶻凝萬金吳鈎拖縵纓
北斗七宿土花發青天寶匣迴機衡斬蛟斷犀
俱細事此物自是蒼龍精江翻河以罔象急提
出白曜搖東溟飛芒殺白帝喉下不可嬰豐城

古獄誰識女斗牛之墟元氣升沙塞秋高塵壓
城黃龍白狼不肯庭山甫無人武安死戰馬西
向徘徊鳴安西都護君好行此物應世世當平
丈夫叱咤鞭風霆國難不赴非俊英劔乎劔乎
吾與女同死生

題九峯書院

負象序興沒大道茂消沉濂伊冥契後作者紛
林林石鼓未榛莽嵩陽亦嶽崱九峯復何如夫
子重幽尋結架雲霞交討求松竹陰探真破衆
眩集虛嗣希音川注理有託物化情迺任鏘鏘
廣陵散寫之龍脣琴閉閣綴道論永爲后賢琛
曰余早迷誤捷逕坐滯淫竊昧無窮門浩蕩糾
寸心睠言握裳衣畢志遵所欽

贈潘子四首

俚子習巴唱佳人奏陽春懷仁出湘浦信美乃
寡倫心期不自媚持以奉明君上絃協鳳吹下
絃泣鬼神邊地霜霰繁剛風凜以辛但恐變商
徵指詰不得伸躊躕廣廡下此意難重陳

其二

大道久湮閉王英改波瀾時流習玄默危言伏
禍患君子守貞亮所貴殉世艱嚴霜被廣域朱
歲駭前觀嘉卉亦摧頽而況莘與管茂子竹栢
意慰我樛櫟顏春華諒峭蒨表之在歲寒

其三

念昔與子別繁霜結崇榕猶懷烏石鑣復轉并
州蓬昔也辰避參今茲鷲離鴻羣生固無極百
齡會有窮平時所交友昏晝誰則同蘭茗向披
靡玄曜豈恒中子其保光惠遠行慰悅悅

其四

浮金肅叢薄黃落栖廣墟念子事孤往煩憂結
不舒斥鷃足蓬蒿鳳凰則高梧誼雅苟不易豈
必均所趨志士貴努力丈夫行棄繻

林員外東甌斗城圖引

連山蒼蒼若星宿大江孤嶼象雲構我行東南
未見此云是東甌斗城子巽吉仁王柄東指松
壇華蓋魁堪擬西山岩堯作領袖就中陳迹無

不有前有王將軍後有謝太守白雲春草蕪沒
久墨池歲歲生芳茆自有王謝經行處至今景
物無塵垢紹興以來產俊英周劉鄭薛次第興
咸淳之上二百載醇正無過王龜齡要皆山川
所毓秀亦自守者善造就林侯風流士直駕王
謝後賓御盡才藻形勝布篆籀功成北首誰與
娛但寫江山入畫圖行邊似防百怪出耳畔長
聞海波入駐鶴亭吹笙臺更有鴈蕩四百峰崔
嵬千年陵谷辭劫灰我生胡爲處溷濁明日黃
冠歸去來

發京邑迷路投宿黑庄

東省多年病南冠百念灰關山一悵望天漢獨
歸來行野蒲稗晚過村笳鼓哀迷途更幾許愁
絕望鄉臺

小岷山歌

君不聞小岷之山連胃婁雄視西川十二州青
天萬古走蜿蜒峯迴嶂轉無時休劔門峨眉各
失勢白帝烏鼠俯之如浮漚上有許由瓢世人

不得用直挂月戶三千秋蒙泉瀉天奔龍湫之
溪浚浚學字流溯騰入汶江萬里滄溟收山中
老桂色不滓芝草琅玕爛成綺洞口長回聲利
車盤石但坐煙霞侶宋有蘇長公隋有劉仙子
採芝斲桂樹長鑿亂雲裏小岷山巉嶒不可攀
劉蘇以後人迹復不到迺有曾東石架屋讀易
於其間平生負此滄海志少年訪道青城山上
殮青城絕壁之流霞下弄岷峨陰壑之潺湲黃
熊蒼兕不敢迫猿狖叫嘯情自懽空谷無人行
蘭草復翻翻揭來遊人世十載愁朱顏吁嗟乎
青山信美蒙泉亦可以洗君耳君胡爲乎城市
許由之瓢欲何俟終南有捷徑北山有俗軌玄
猿獨鶴煖眼冷眼遙看爾紅塵白馬有何益柴
桑不負陶彭澤歸來乎曾東石

武夷曲次晦翁棹歌十首

幔亭彩幄會仙靈紫霧濛濛薄太清奏罷人間
可哀曲鳳笙龍管杳無聲

其二

真詩 卷之一
沙棠爲楫桂爲船紫嶂丹厓錦映川我是開元
李居士鐵龍吹散萬峯煙

其三

不道巫陽十二峯玉環珠珮淨雲容美人婉婉
秋波立迥隔天關百二重

其四

藏裏黃棺壑上船春風秋雨自年年覺來天地
終歸盡煉得丹成亦可憐

其五

蛻骨藏真傳此巖土花石黛已氍毹那能縣綆
探金樁下擣龍宮萬仞潭

其六

大隱屏前煙水深九霄雲覆紫芝林彤墀不作
含香夢丹洞忻傳出世心

其七

水過蒼屏灣對灣山形密似百牢關巨鼇不戴
東溟去要與乾坤作大閑

其八

博羅東下三百灘噴雪奔雷仰面看虬龍不出
蝮蛇出天風下來吹歲寒

其九

石鼓雲樓天漢開飛泉幾道白龍洞探元笑入
桃源路黃葉千巖風雨來

其十

九溪歷盡興條然亂瀑喧
明河曲飛鳥還過一字天

鄭詩卷之一

終

鄭詩目錄

卷之二

東海有一士

黃伯固

秋夜遲王員外時行

初離京邑留別諸同志四首

天末逢故人

天津同王劉二子較射西營因賦長歌

野田黃雀行

見蜚鴈

夜入魯北鄙

放船

泗上

對湖二首

汶上對月聞笛作商調哀切命船人度曲

為和因賦醉歌

過彭城懷舊二首 呂梁

謁留侯祠 悼劉宓

得思道消息二首 聞開化用兵寄思道

聞吾廷介避亂客死藁葬道隅

聞孫山人在西湖水寺

歲晏懷近夫 憶弟

白下訪方山人 猛虎行

鍾吾行 桃源行

行淮北戰場 金陵

大雪行三茆山中 孤山寄太白山人

天竺 牛首

遊煙霞洞天 臘

歸來 進衣

兵起 錢塘

贈何仲默 贈近夫

發越州

臥

遊子

嚴陵灘

去年行

兵馬行

百憂行

憶李御史雲

故太傅于公謙

贈方豪

卽事

謗興

嚴州

歲晏行

歲暮入江郎山訪周山人

須溪除日

梨關

竹枝詞二首

人日

送王叅知赴闕

畫鷹

八月二日

憶近夫

楚客

臯魚子

得思道書

答近夫思道

今辰行送張敬中

送林仲穎赴馬平

登道場絕頂用太初韻

鄭詩卷之二目錄終

鄭詩卷之二

閩中鄭善夫繼之著

郡人鄧原岳女高

謝肇淛在杭同校

東海有一士

東海有一士被服雲錦裳饑飧炎洲霞渴吸瑤池漿鶴馭何翩翩九垓一相羊朝發崗良野夕憇沉默鄉睠言與汗漫抗臂窮洪荒九州雖云大視之如室堂紛紛尺蠖徒看彼鴻鵠翔

黃伯固

黃郎遯世士抱影處空谷擷芳上木末采藻立
水澳妙善難可隣歲暮守幽獨懷姝匪自媚出
門重結束風雲一撫念故術草豐蓐鄙夫附丘
阿達者從所欲康樂營石門知章疏剡曲存道
苟不貳豈貽山靈辱

秋夜遲王員外時行

涼風升寒節切切充重幃堅冰戒時至鴻鴈明
其幾春滋淨不處秋隼方高飛鑿物沉幽志誰
能不懷歸素月臨丘榛灼灼澄員暉員暉豈不
愛零露沾我衣遲我同懷子濡滯尚安之呼琴
爲子鳴調苦使心違不恨歲載徂但恨知音稀
盈縮本恒理傷哉生別離

初離京邑留別諸同志四首

陳車遵城闔振策導廣路仰盼孤雲征俯見流
波泝感念平生懽豈以杯酒故羣居不自覺相
失增怨慕川河引舟楫陵陸曠烟霧重覲難可
尋努力敷襟素

其二

浮萍戀故波離鳥思故林故林既得期儔侶無
遺音與子共朝夕奚堪更商參山河日以邈霜
霰日以深鴻鱗無時至安能訴幽襟晤好諒有
時迅節忽載陰願言敦明德白首慰離心

其三

馳車太行坂北首入楚澤迷途不早悟困頓安
所適爵服載憂患趨者何充斥流俗日向靡胡
爲重濡跡京塵復何長不見所緇白凡駘御文
輿赤驥且辟易誰能違衆好共整東山屐

其四

長歌逾薊門凝眸眺崇京陵闕何崔嵬馬行令
心怍雖云返鄉域不獲偕良朋勞鶻無勁翮斷
鴻有離聲幽期莫可竝沉慮獨拊膺

天末逢故人

不耐秋風搖落後與君把袂看飛蓬關山無地
干戈息江海何年笑語同歲晏柳條那忍折天
涯車轍尚難通蕭條更問桑乾路目斷園陵煙

霧中

天津同王劉二子較射西營因賦長歌

病夫平生滄海情南征喜得王時行天津橋邊
秋氣清邀我醉遊劉伯耕投壺叫白意未已乃
復較射城西營劉君膂力信莫當控弦運肘固
所長王郎生長在南方亦能左挽五石強調弓
坐使猛獸伏矯矢豈有飛禽翔當場角勝不相
降神臂拍張人堵牆伶人考鼓輿臺走白日冉
冉迴精光鋒翎衝撞氣益揚觀者顏色歛沮傷
熊渠以上合比數拔勝之輩斯尋常病夫雖然
力不足見爾誰能分碌碌騰身卽把忘歸接引
手轉被繁弱拘沉思重自咎百罰敢辭辱忽憶
先皇時此技何曾錄承平却作兗器比喪亂
始識文事跼乾坤比年氛稜厚幽豫青徐虎狼
吼專城將軍習逃走遂令死者十八九至今楚
蜀猶未夷六軍雖衆能者誰轅門衣冠更寬博
教場藜莧成町畦吁噉王劉學孔子反有餘力
從事此幸須爲國收多壘吾聞茲藝德之輔匪

直區區爲闕武君不見矍相圃公罔之裘揚解
語衛昌蒙弄巧弗取射乎射乎吾愧汝

野田黃雀行

玃玃黃雀集彼榛柯上有鷲鳥下有虞羅低飛
不可高飛奈何曷不去此野田有禾鵬雛搖搖
隼則制之兎且織織鴻則罹之龍潛在淵可以
全身壤蠖不屈何以引伸朱鳳威垂稠羽是依
鴟景化之矰弋安施

見蜚鴈

涼風動沙磧朔鴈至紛紛爲避陰山雪翻衝楚
澤雲嗷嗷清作籟總總字成文意適稻梁得心
驚弋彈聞時縣出塞夢宵妬下鞬勛遠愧青田
鶴高飛絕世氛

夜入魯北鄙

不見黃花面淒其白鴈前清渠接淮泗衰草入
幽燕月露猶團夜兵戎更積年歸途不可極賈
夢歲寒天

放船

施樓下急浪去險在毫端已識篙師巧方憂蜀
道難此溪防罔象何日避風湍頗羨玄真子清
時把釣竿

泗上

總總衣冠地方冬生事繁牛羊散迥野煙火接
長村薙藿農人聚分瓜稚子喧如何惡官府鑿
破此淳源

對湖二首

惝惝玄陰日團團照水隈鯨波動霄漢鼉鼓挾
風雷地盡青山杳天寒白鳥回輕帆未相失自
此訪蓬萊

其二

遠水明如鏡平林渺欲迷天多足鴻鴈沙暖定
鳧鷖秋事關身世湖聲避鼓鼙老漁吾愧汝曼
衍聽天倪

汶上對月聞笛作商調哀切命船人度曲
爲和因賦醉歌

焉耆八月高風起鴻鴈羣飛渡洪水月下清砧

愁遠人天涯芳草思公子王郎哀時最蕭瑟萬
里迢迢向南國呼我上船設冰鱠仰天頌酒開
胸臆關山茫茫何處邊但見急管哀中天馮夷
聽曲波面出楊柳亂落西風前酒酣月落歌未
已隴思江情嗒然起未掛姓名玉策上願添海
水金樽裏人生合歡那可測有似大海翻萍葉
回首親朋各別離豈無江漢通舟楫流光過鳥
不復駐達官好爵身之蠹况迺豺狼橫地軸何
限驂騑窘天步竹林諸賢皆酒徒嗣宗只願步
兵厨古來賢達一澌盡醉鄉之托今何如

過彭城懷舊二首

自有干戈後年年向此過乾坤未解甲江海且
增波拊劍心逾壯經時髮易皤渭南無夢到終
是臥煙蘿

其二

憶昔此避地諸君慰我多別來淹日月望爾邈
山河洒淚山陽笛關心隴水歌猶聞殺長吏飄
泊復如何

呂梁

葱嶺崑崙外呂梁天地間
溯騰終赴海咆吼欲
頽山力轉魚龍窟
秋生虎豹關平生歷險阻對
此淚潸潸

謁留侯祠

吾慕張子房乃是紫霞客
志士有苦心麟趾暫
驅策功隳博浪沙
折節下黃石談笑用漢祖
畢志任所適神山逝朱鳳
鷲鳥空累百

悼劉宓

宓也歸何處營魂不可招
只疑天地闊竟作死
生遙苦海風濤壯炎方
罔兩驕傷心臥佛寺秋
雨自蘭若

得思道消息二首

聞汝還家後逢時俶擾初
艱難仍被寇墨經却
離居邊徼猶多故山園未可鋤
棠陵幸襄事亦得慰區區

其二

近逢黃吏部報爾在三衢
志士傷泥滓南州困

真言 卷之二
狹狷時危離索久歲晚帛書無却憶吳門約蕭
條愧病夫

聞開化用兵寄思道

舊是桃源地如何喪亂滋荷及連老少流血滿
潢池蜀道奔惟汝荊州仗有誰尊翁在垂白莫
遣怨流離

聞吾廷介避亂客死藁葬道隅

識面胥臺夕論心滸墅時功名非爾輩文藻是
吾師命薄長遺世才高更忍饑天如產麟鳳王
不夢熊羆久着東山屐頻歌濮水詞邴原明進
退杜甫昧生涯已是哀黃髮仍兼陷赤眉修身
渾欲到得禍一何奇寂莫榱楹折荒蕪氣運衰
人皆牖下死子有道傷疑叔寶時多惜嵇康我
獨悲君門數行淚不但致吾私

聞孫山人在西湖水寺

吳門往日聽談玄塞鴈江魚動隔年聞爾獨居
水西寺與誰同泛六橋船魚翻荇帶錦不亂鳥
下蘼蕪青可憐擬把郢筒共梅蕊兼程定得小

春天

歲晏懷近夫

不見殷郎又一年，每憑魂夢到青田。
成家文學人皆仰，爲邑風流世共傳。
嵇呂豈辭千里駕，桃哀真結此生緣。
孤山雲物負殘臆，鴈宕煙霞愁遠天。

憶弟

去年蘇臺送汝歸，布被獨臥愁依依。
畚田力薄霜雪厚，憐汝受凍仍啼飢。
北有鴻鴈南鯉魚，但見風塵不見書。
深林大道防豺虎，萬里看雲涕如雨。

白下訪方山人

山人不是方外客，十載江湖桑苧悲。
豈爲饑寒歷辛苦，坐教詞藻歛瑰奇。
南征却道如司馬，老去終傷失惠施。
白下風煙得見否，憶君長誦考槃詩。

猛虎行

玄陰冥冥天欲雨，蒼兕嗥風劈林莽。
磨牙下山

天爲愁白日殺人如捕鼠我忽聞言仗劍出彎
弓却射白石入吁嗟鳳麟無時來故使此輩爲
民菑不然驅汝渡河去河北蒼生非草萊

鍾吾行

皚霜凜凜頽楊柳鍾吾驛前白狐走山東虎穴
已盡除淮北人煙亦何有自從天狼犯東斗殺
掠如山如拉朽四溟兵氣寂不揚縱有城隍誰
則守黃河無梁葦可渡曷不去此甘爲虜就中
一室三十口那得孤兒應門戶投生避死誰不
知鍾吾令長實王之

桃源行

黃河水盡蛟龍馴桃源沙飛愁殺人東方亂後
再反覆憶昔過此增煩辛扁舟困頓不得攜賊
壕只在河東西路官邑子微服走大屋高門狨
獍啼到今事定還是非請問流民歸未歸

行淮北戰場

我軍渡淮水倉卒見賊壘一聲金鼓鳴馬躍昏
風起三千義兵坐倒戟一日同赴黃河死嗟爾

真言 卷之二
漁樵人何曾識蒐狩但聞鶴唳膽已落乃使執
盾從敵後邊頭將軍故縮手要取金印大如斗
淮陰寡妻啼向天遺恨東行劉太守

金陵

紫禁金門閉寂寥不聞清樂下丹霄 高皇事
業如天地過客何須話六朝

大雪行三茆山中

解束悟服食營慮結山水比聞三峯秀賡懽一
來此同雲布坤維六花漫不止升危滯遐蹤寓
目殺高志真源不可往罔域兼泥滓居凡殊所
厭還丹亦難恃太虛本宅無彭殤同已矣安得
莊生達相與析玄理

孤山寄太白山人

爲問山人孫太初交情歲晚莫交疎孤山梅萼
春相惱滿地松苓日自鋤江夏肯容襦處士茂
陵初臥馬相如知君不廢茗溪釣書帛能無寄
鯉魚

天竺

真詩 卷之二
旬有五日不出戶闌風伏雨寒蕭蕭偶爾尋僧
入三竺多方索梅窮六橋黃精紫蕨亦自飽瑤
草瑤花還見招旌旄滿山江浪惡腐儒解組爲
漁樵

牛首

牛首有佳致方冬亦自奇同雲封地軸積雪糝
松枝谷響傳鐘磬山昏泣罔魑憑高俯王土何
意有旌旗

遊煙霞洞天

今我忽不樂駕言結遊駟遙望南山木鬱鬱有
真意崖瀑垂素幢谷風擊繁吹洞幽無別踪白
雲藹而至狻啼修術暗猱開樛枝墜山精綠羅
衣見客宛自媚形遺物不違真存道匪貳鑒茲
澁心想去與衆俱棄

臘

南州不待律臘後暖相催久客惜殘歲他時聞
落梅家家斗酒會何處短笳哀却憶江西北漁
樵戍未回

歸來

不作東曹屬歸來巾屨幽豈能効舐痔聊且避
犧牛玉木深防病甌噐未省憂此邦蝦菜賤家
室暫淹留

進衣

何處避冰雪頻懷負日暄未衰筋力憊獨立布
衣存列子愁居鄭袁安早閉門粵南多爽氣歸
去牧雞豚

兵起

自有西江亂流民起帶刀操差盡孺弱殺戮到
耆髦虜馘時猶獻軍需日更騷長纓未得請無
計洗腥臊

錢塘

萬山赴海國衆水匯錢塘王氣千年歇潮聲八
月長世傳渾罔兩天巧亦荒唐稍待涼風發乘
槎問彼蒼

贈何仲默

何子生知姿弱齒咏鳳皇垂帷破墳籍一目能

十行雅調走鮑謝雄才抗班揚黃鍾一徹虛絲
管空鏗鏘陸沉金馬門卒歲泣麟傷賈生亦逢
時杜甫終爲郎古來聖哲士位細非所妨光光
大復山後賢永相望

贈近夫

石川山東晶童稚只自樹昔探莊老窟終蹈宣
尼矩學術通天人聲華照區宇中年隸宦籍志
豈屑軒組挂冠四五載遜迹謝官府近因避虎
豺復出圖三釜海邑方用兵庶務紛蚤聚才聞
僭寇恂已見思何武吾觀江河流喧豗惡足數

發越州

生無冠組分碌碌守迤邐越南十二月盡室復
遠遷故國眇天末扁舟薄言旋閩中地氣暖可
免絲與綿舊業雖荒蕪尚有一頃田他鄉困饑
寒胡爲重畱連且聞江海熟已不憂荒年此州
固信美旅寓豈其然盤飧未易邁薪水亦費錢
雖得山水玩顧非貧士便素癖厭人事況乃居
市廛毅然舍此去飄颻御風煙夜泊桐江雲放

歌漁父篇朝登富春山釣臺兩高懸如云迫遲
暮頓覺忘憂煎行復經武夷真詮落吾緣引手
向紫霞高招控鶴仙沅瀆亦可飽安能逐鴟鳶
跼跼禹跡裏衷情向誰宣

臥

黃帽青鞋何處尋道人高臥南山陰閒誦維摩
一百偈白雪牀前三尺深

遊子

桐江水清石可數遊子思歸作漁父空谷春深
記薜蘿長途日暝憂豺虎入林何曾見赤雀結
舌詎可賦鸚鵡皇天反正誰則知有客哀傷重
延佇

嚴陵灘

咄咄嚴子陵竟不能下爾迢迢富春山潤潤桐
江水眇眇窮居士皇皇漢天子當年布衣交一
旦君臣禮渭川罷釣綸莘野釋耒耜上賢尊天
瑞所願贊天紀但非魚水會徃徃委泥滓明王
久不作吾道長已矣

去年行

去年狼山北風緊斗間坐見狼星殞南下旌旗
若震電東奔盜賊如齏粉皇天厭亂欲大誅爾
輩曷早爲身圖好趁天兵未臨女卽銷鋒鏑作
農夫

兵馬行

越南諸州復召募滾滾盡赴姚源戍鉦鼓聲填
滄海鼉旌旗色閃扶桑樹櫓槍耀芒犯女斗虎
豺也更能咆吼部伍存亡不可知擣衣愁殺閨
中婦天寒野營雪嵯峨指墮未易親干戈幾時
奏凱標銅柱願得將軍似伏波

百憂行

自我結束出門時正值世路多艱危匪才被蒙
主司錄壯圖恐負平生期刑臣干紀作厲階此
輩乘勢爲狐狸朝中衣冠死桎梏意外括索空
茅茨君門萬里不可測虎豹九關那得窺所以
流殃遍海岱使我積憤齊峨嵋一時安化起作
孽敢睨神器寧無詞山東鐵騎皆王臣亦忍弄

兵於潢池 高祖社稷豈易改 孝宗惠愛無
子遺所賴 天子開神聰大加顯誅不復疑繼
是諸賢出補葺至今萬姓猶瘡痍朔方三邊屢
入寇桂林羣獠長勞師意者蠻貊本梗化雖在
平世亦若斯荆巴乃是荒服內五載恃險夫何
爲要之主將愛生事民瘼肯與朝廷知遂令赤
子化魑魅乳臭小兒盡緋衣況聞村落吏捉人
比併只爲供軍需去年華林覆大衆今年姚源
殺偏裨乃者狼兵豈得已所過慘於熊與羆四
方郡邑所召募紀律不一皆逃歸以此公私厭
金革廟議復欲爲羈縻安得一下罪已詔民得
粒食莫爲非

憶李御史雲

憶昔在吳會與子共昕夕劇談倒百壺醉咤滄
溟窄晨光倏不處人事轉淒惻予復苦羈旅子
已作逐客鄱陽波浪深南岳瘴霧塞鴻冥天萬
里帛書經歲得誰知消息來竟作幽明隔冥契
既永逝今我何蕭摵曩時青蓮花持抱化爲石

回首靈源山雲際且屏迹

故太傅于公謙

太傳出南方眉宇天人表曩在英廟朝讜論
 多了了三邊正統末胡羯日俶擾先皇巡朔
 方虜騎伏潢沼黃雲阨塞垣仙仗迷周道法駕
 一蒙塵作意索金寶京城既搖動和議雜紛糾
 公時贊戎機決策截瀾倒告廟定儲君誓衆守
 隍堡耀兵向陰山直欲舉征討居庸扼咽喉鐵
 馬豈得搗坐令虜計窮食盡師遂老翠華果全
 歸黃屋免再造雖重獲罪戾社稷功非小功高
 反殺身於古亦嘗有固由天威赫寔爲青蠅媯
 天日終輝輝卽見是非瞭神衷啓後聖殊錫
 達幽眇憶昔靖康亂謀國何草草堂堂宋諸良
 唯唯遵和好甘心拜犬羊所以至絕島直書在
 史氏公節須皦皦

贈方豪

崑山天下士抗懷薄秋旻作詩接元白開口奔
 鬼神狂來放厥詞妙得造化真習尚罕時好結

交必古人三年策仕版八口還憂貧民俗日向
澆直欲回其淳尸名況疾惡所以讒柄新鄒陽
固得譴鄭僑終見親迷途墮老漁誰辯玉與珉
君看棠陵山萬古當嶙峋

卽事

卽事春相近回船日日操徽陽留朔雪久旱失
溪毛衢府風煙改常山斥堠高危途疲繭客泪
汨向蓬蒿

謗興

日月隨人事溪山共客情水清魚避影松靜鶴
畱聲枌梓怡前輩文章達後生時聞扣牛角猶
愧似要名

嚴州

小傳清江並孤城碧嶂防土宜多竹柏民業但
耕桑稻熟還官得山深伐木長經過數州郡淳
朴見茲鄉

歲晏行

烏龍山頭鴉亂飛客子迫歲憂蒸藜姚源餘孽

幾反覆玉山一路方塗泥黃雲阨關鼯狖啼前
有戈鋌後鼓鞞十年通籍何辛苦猶自飄蓬負
老妻

歲暮入江郎山訪周山人

江郎三峯開畫屏上有朗朗處士星脩淵將到
壺丘子憤世却續南華經松間相信鶴一隻洞
口長生芝數莖釣渭耕巖不違志乘桴余亦下
滄溟

須溪除日

茲夕乃何夕忽忽歲云徂南征歷寒溫猶滯天
一隅去年闔閭城今年姑蔑墟風塵久未厭豈
得念故都懷中兩女兒旦夕如長鳧出門初學
語今能效屠蘇團欒豈慰意惻惻悲隙駒比鄰
數知舊別後還有無爵服既不情鈴汞亦我誣
九野天浩蕩奄奄正愁予

梨關

梨關不可上戰格屹雲端閩浙乾坤別風煙道
路難隄防莫斃廢戎馬未全安謬想先皇日

車書達百蠻

竹枝詞二首

西澗西邊東澗東
千山不斷萬山通
謝豹見春啼
出血王孫上樹捷如風

其二

梨嶺遙於楓嶺遙
小關高比大關高
傭夫過嶺如平地
一歲來迴一百遭

人日

病起獨吟溪上樓
煙波雲木共悠悠
細斟栢葉酬人日
湯嗅梅花憶隴頭
天遠美人長在望
路危春色未銷憂
南行故國柴門迥
擬把綸竿伴白鷗

送王叅知赴闕

大叅行赴闕興落富春前
六月樓船雨千山
傳馬煙白雲留故國
綵服媚南天
知爾寧親後屏營金鑑篇

畫鷹

似欲飛騰起
星眸勢可招
平生酣白戰
遠志碍

青霄竹兔何愁得林獮不敢驕無由配鸞鳳勿
以比鴟梟

八月二日

曲巷疎籬小院幽荒村獨夜竹桐秋星河正值
銷魂地鴻鴈還過何處樓臥病豈堪聞木葉息
機猶自着羊裘碧霄萬里風雲氣起凭危闌歌
四愁

憶近夫

吳門相失後書札各茫然巢父終東去劉郎重
北遷雙鳧赴魏闕獨鶴下青田未見風塵淨懷
君涕淚邊

楚客

楚客望不返行坐楚天心荆門未可涉洞庭波
正深

臯魚子

陟阿丘以風白楊搖搖朝暮中烏棲白楊樹飛
過阿丘宮臯魚子抱樹啼爲我問終風何事無
已時父母不得養兒心亡絕期兒心有絕期木

華落盡風不吹

得思道書

伏枕忽傳車馬使攬衣迎問已沾巾開緘蕭颯
見汝面回首蒼茫任此身司馬著書長抱病黔
婁爲道不辭貧滄江冷落梅花晚獨抱遺芳向
遠人

答近夫思道

憶昔三吳共臨眺上山不用杖藜扶只今臥病
難行立聞爾加飧定有無千里音塵雙涕淚萬

方憂患獨泥塗蠻煙朔雪催人事愁對城南鵝
鴨湖

今辰行送張敬中

今辰何辰秋復暮黃花欲吐且未吐越王臺上
風不迴謝女江邊葉如訴征途遙遙不肯住歲
晏天涯向何處冀北能無屬目雲閩南會見傷
心樹憶昨奏賦大明宮綈袍布被昕夕同于時
公壯我尚少許身奚啻登夔龍黃塵白日兩相
蒙世事變覆真太匆十年風波苦汎梗一日鬢

髮成飄蓬阜鶻飛來意怠杳龍媒跛足眠芳草
勛業空嗟明鏡中巾鞋早向荒山道公今走馬
黃金臺黃金安得如山堆自信材官少貧賤豈
有志士久塵埃石田豆苗半枯死余獨憂勤弄
煙水劉向何心厭簪紱管寧薄命甘泥滓他日
西方相憶無北魚南鴈徒爲爾

送林仲穎赴馬平

東浮淮海三千水南過羅浮四百峯知爾欲尋
勾漏令會看雞犬白雲中

登道場絕頂用太初韻

峯頭獨立雲霧飛天畔風迴蒼玉扉深林日落
豺虎伏橫江浪高舟楫稀舉目中原望不極側
身滄海愁依依峴山雪水秋意動故園幽事行
當歸

鄭詩卷之二終



